

四庫全書薈要

• 乾隆御覽本

史部

欽定四庫全書薈要

史部

通鑑紀事本末卷三十一上

詳校官員外郎臣楊世綸



通鑑紀事本末卷三十一上 宋 袁樞 撰

李林甫專政

唐玄宗開元二十二年

吏部侍郎李林甫柔佞多狡數

深結宦官及妃嬪家伺候上動靜無不知之由是每奏

對常稱旨上悅之時武惠妃寵幸傾後宮生壽王瑁諸
子莫得為此太子浸疎薄林甫乃因宦官言於惠妃願
盡力保護壽王惠妃德之陰為內助由是擢黃門侍郎

五月戊子以裴耀卿為侍中張九齡為中書令林甫為
禮部尚書同中書門下三品

二十四年 初上欲以李林甫為相問於中書令張九
齡九齡對曰宰相繫國安危陛下相林甫臣恐異日為
廟社之憂上不從時九齡方以文學為上所重林甫雖
恨猶曲意事之侍中裴耀卿與九齡善林甫并疾之是
時上在位歲久漸肆奢欲怠於政事而九齡遇事無細
大皆力爭林甫巧伺上意日思所以中傷之上之為臨

溜王也趙麗妃皇甫德儀劉才人皆有寵麗妃生太子
瑛德儀生鄂王瑤才人生光王琚及即位幸武惠妃麗
妃等愛皆弛惠妃生壽王瑁寵冠諸子太子與瑤琚會
於內第各以母失職有怨望語駙馬都尉楊洄尚咸宜
公主常伺三子過失以告惠妃惠妃泣訴於上曰太子
陰結黨與將害妾母子亦指斥至尊上大怒以語宰相
欲皆廢之九齡曰陛下踐祚垂三十年太子諸王不離
深宮日受聖訓天下之人皆慶陛下享國久長子孫蕃

昌今三子皆已成人不聞大過陛下柰何一旦以無根之語喜怒之際盡廢之乎且太子天下本不可輕搖昔晉獻公聽驪姬之讒殺申生三世大亂漢武帝信江充之誣罪戾太子京城流血晉惠帝用賈后之譖廢愍懷太子中原塗炭隋文帝納獨孤后之言黜太子勇立煬帝遂失天下由此觀之不可不慎陛下必欲為此臣不敢奉詔上不悅林甫初無所言退而私謂宦官之貴幸者曰此主上家事何必問外人上猶豫未決惠妃密使

宮奴牛貴兒謂九齡曰有廢必有興公為之援宰相可
長處九齡叱之以其語白上上為之動色故訖九齡罷
相太子得無動林甫日夜短九齡於上上浸疎之林甫
引蕭炅為戶部侍郎炅素不學嘗對中書侍郎嚴挺之
讀伏臘為伏獵挺之言於九齡曰省中豈容有伏獵侍
郎由是出炅為岐州刺史故林甫怨挺之九齡與挺之
善欲引以為相嘗謂之曰李尚書方承恩足下宜一造
門與之款晤挺之素負氣薄林甫為人竟不之詣林甫

恨之益深挺之先娶妻出之更嫁蔚州刺史王元琰元琰坐賊罪下三司按鞫挺之為之營解林甫因左右使於禁中白上上謂宰相曰挺之為罪人請屬所由九齡曰此乃挺之出妻不宜有情上曰雖離乃復有私於是上積前事以耀卿九齡為阿黨十一月壬寅以耀卿為左丞相九齡為右丞相並罷政事以林甫兼中書令仙客為工部尚書同中書門下三品領朔方節度如故嚴挺之貶沼州刺史王元琰流嶺南九齡既得罪自是朝

廷之士皆容身保位無復直言李林甫欲蔽塞人主視
聽自專大權明召諸諫官謂曰今明主在上羣臣將順
之不暇烏用多言諸君不見立仗馬乎食三品料一鳴
輒斥去悔之何及補闕杜璡嘗上書言事明日黜為下
邳令自是諫爭路絕矣牛仙客既為林甫所引進專給
唯諾而已然二人皆謹守格式百官遷除各有常度雖
奇才異行不免終老常調其以巧諂邪險自進者則超
騰不次自有它蹊矣林甫城府深密人莫窺其際好以

甘言啗人而陰中傷之，不露辭色。凡為上所厚者，始則親結之，及位勢相逼，輒以計去之。雖老姦巨猾，無能逃其術者。

二十五年夏四月辛酉，監察御史周子諒彈牛仙客、非才、引讖書為證，上怒甚，命左右搢於殿庭，絕而復蘇。仍杖之朝堂，流瀼州，至藍田而死。李林甫言子諒、張九齡所薦也。甲子，貶九齡荊州刺史。楊洄又譖太子瑛、鄂王瑤、光王琚云與太子妃兄駙馬薛鏞潛構異謀，上召宰

相謀之李林甫對曰此陛下家事非臣等所宜預上意
乃決已丑使宦者宣制於宮中廢瑛瑤琚為庶人流鏞
於灤州瑛瑤琚尋賜死城東驛鏞賜死於藍田瑤琚皆
好學有才識死不以罪人皆惜之丙寅瑛舅家趙氏妃
家薛氏瑤舅家皇甫氏坐流貶者數十人惟瑤妃家常
氏以妃賢得免

二十六年太子瑛既死李林甫數勸上立壽王瑁上以
忠王璵年長且仁孝恭謹又好學意欲立之猶豫歲餘

不決自念春秋浸高三子同日誅死繼嗣未定常忽忽
不樂寢膳為之減高力士乘間請其故上曰汝我家老
奴豈不能揣我意力士曰得非以郎君未定邪上曰然
對曰大家何必如此虛勞聖心但推長而立誰敢復爭
上曰汝言是也汝言是也由是遂定六月庚子立璵為
太子

二十七年夏四月己丑以牛仙客為兵部尚書兼侍中
李林甫為吏部尚書兼中書令揔文武選事 秋九月

戊午太子更名紹

天寶元年 李林甫為相凡才望功業出己右及為上所厚勢位將逼己者必百計去之尤忌文學之士或陽與之善啗以甘言而陰陷之世謂李林甫口有蜜腹有劍上嘗陳樂於勤政樓下垂簾觀之兵部侍郎盧絢謂上已起垂鞭按轡橫過樓下絢風標清粹上目送之深歎其蘊藉林甫常厚以金帛賂上左右上舉動必知之乃召絢子弟謂曰尊君素望清崇今交廣藉才聖上欲以

尊君為之可乎若憚遠行則當左遷不然以賓詹分務東洛亦優賢之命也何如絢懼以賓詹為請林甫恐乖衆望乃除華州刺史到官未幾誣其有疾州事不理除詹事員外同正上又嘗問林甫以嚴挺之今安在是人亦可用挺之時為絳州刺史林甫退召挺之弟損之諭以上待尊兄意甚厚蓋為見上之策奏稱風疾求還京師就醫挺之從之林甫以其奏白上云挺之衰老得風疾宜且授以散秩使便醫藥上歎吒久之夏四月壬寅

以為詹事又以汴州刺史河南採訪使齊澣為少詹事
皆負外同正於東京養疾澣亦朝廷宿望故并忌之
秋七月辛未左相牛仙客薨八月丁丑以刑部尚書李
適之為左相

二年上以右贊善大夫楊慎矜知御史中丞事時李林
甫專權公卿之進有不出其門者必以罪去之慎矜由
是固辭不敢受五月辛丑以慎矜為諫議大夫

三載冬十二月戶部尚書裴寬素為上所重李林甫恐

其入相忌之刑部尚書裴敦復擊海賊還受請託廣序

軍功寬微奏其事林甫以告敦復敦復言寬亦嘗以親

故屬敦復林甫曰君速奏之勿後於人敦復乃以五百

金賂女官楊太真之姊使言於上甲午寬坐貶睢陽太

守初上自東都還李林甫知上厭巡幸乃與牛仙客

謀糴近道粟賦及和糴以實關中數年蓄積稍豐上從

容謂高力士曰朕不出長安近十年天下無事朕欲高

居無為悉以政事委林甫何如對曰天子巡狩古之制

也且天下大柄不可假人彼威勢既成誰敢復議之者
上不悅力士頓首自陳臣狂疾發妄言罪當死上乃為
力士置酒左右皆呼萬歲力士自是不敢深言天下事
矣

四載李適之與李林甫爭權有隙適之領兵部尚書駙
馬張垧為侍郎林甫亦惡之使人發兵部銓曹姦利事
收吏六十餘人付京兆與御史對鞠之數日竟不得其
情京兆尹蕭昊使法曹吉溫鞠之溫入院置兵部吏於

外先於後廳取二重囚訊之或杖或壓號呼之聲所不忍聞皆曰苟存餘生乞紙盡答兵部吏素聞溫之慘酷引入皆自誣服無敢違溫意者頃刻而獄成驗囚無撈掠之迹及林甫欲除不附已者求治獄吏吳薦溫於林甫林甫得之大喜溫常曰若遇知己南山白額虎不足縛也時又有杭州人羅希夷為吏深刻林甫引之自御史臺主簿再遷殿中侍御史二人皆隨林甫所欲深淺鍛鍊成獄無能自脫者時人謂之羅鉗舌網 秋九月

癸未以陝郡太守江淮租庸轉運使常堅為刑部尚書
罷其諸使以御史中丞楊慎矜代之堅妻姜氏皎之女
林甫之舅子也故林甫昵之及堅以通漕有寵於上遂
有入相之志又與李適之善林甫由是惡之故遷以美
官實奪之權也

五載春正月乙丑以隴右節度使皇甫惟明兼河西節
度使李適之性疎率李林甫嘗謂適之曰華山有金礦
采之可以富國主上未之知也它日適之因奏事言之

上以問林甫對曰臣久知之但華山陛下本命王氣所
在鑿之非宜故不敢言上以林甫為愛已薄適之慮事
不熟謂曰自今奏事宜先與林甫議之無得輕說適之
由是束手矣適之既失恩韋堅失權益相親密林甫愈
惡之初太子之立非林甫意林甫恐異日為已禍常有
動搖東宮之志而堅又太子之妃兄也皇甫惟明嘗為
忠王友時破吐蕃入獻捷見林甫專權意頗不平時因
見上乘間微勸上去林甫林甫知之使楊慎矜密伺其

所為會正月望夜太子出遊與堅相見堅又與惟明會
於景龍觀道士之室慎矜發其事以為堅戚里不應與
邊將狎暱林甫因譖堅與惟明結謀欲共立太子堅惟
明下獄林甫使慎矜與御史中丞王鉷京兆府法曹吉
溫共鞠之上亦疑堅與惟明有謀而不顯其罪癸酉下
制責堅以干進不已貶縉雲太守惟明以離間君臣貶
播州太守仍別下制戒百官夏四月韋堅等既貶左
相李適之懼自求散地庚寅以適之為太子少保罷政

事其子衛尉少卿霅嘗盛饌召客客畏李林甫竟日無

一人敢往者以門下侍郎崇玄館大學士陳希烈同

平章事希烈宋州人以講老莊得進專用神仙符瑞取媚於上李林甫以希烈為上所愛且柔佞易制故引以為相凡政事一決於林甫希烈但給唯諾故事宰相午後六刻乃出林甫奏今太平無事已時即還第軍國機務皆決於私家主書抱成案詣希烈書名而已秋七月將作少匠韋蘭兵部員外郎韋芝為其兄堅訟寃且

引太子為言上益怒太子懼表請與妃離昏乞不以親
廢法丙子再貶堅江夏別駕蘭芝皆貶嶺南然上素知
太子孝謹故譴怒不及李林甫因言堅與李適之等為
朋黨後數日堅長流臨封適之貶宜春太守太常少卿
韋斌貶巴陵太守嗣薛王琬貶夷陵別駕睢陽太守裴
寬貶安陸別駕河南尹李齊物貶竟陵太守凡堅親黨
連坐流貶者數十人斌安石之子琬業之子堅之甥也
琬母亦令隨琬之官冬十一月贊善大夫杜有鄰女

為太子良娣良娣之姊為左驍衛兵曹柳勣妻勣性狂
疎好功名喜交結豪俊淄川太守裴敦復薦於北海太
守李邕邕與之定交勣至京師與著作郎王曾等為友
皆當時名士也勣與妻族不協欲陷之為飛語告有鄰
妄稱圖讖交構東宮指斥乘輿林甫令京兆尹曹古溫
與御史鞠之乃勣首謀也溫令勣連引曾等入臺十二
月甲戌有鄰劾及曾等皆杖死積尸大理妻子流遠方
中外震慄嗣號王巨貶義陽司馬巨邕之子也別遣監

察御史羅希奭往按李邕太子亦出良娣為庶人乙亥
鄴郡太守王琬坐貶江華司馬琬性豪侈與李邕皆
自謂耆舊久在外意怏怏李林甫惡其負材使氣故因
事除之

六載春正月辛巳李邕裴敦復皆杖死邕才藝出衆盧
藏用常語之曰君如干將莫邪難與爭鋒然終虞缺折
耳邕不能用林甫又奏分遣御史即貶所賜皇甫惟明
韋堅兄弟等死羅希奭自青州如嶺南所過殺遷謫者

郡縣惶駭排馬牒至宜春李適之憂懼服藥自殺至江
華王琚仰藥不死聞希夷已至即自縊希夷又迂路過
安陸欲怖殺裴寬寬向希夷叩頭祈生希夷不宿而過
乃得免李適之子雷迎父喪至東京李林甫令人誣告
雷杖死於河南府給事中房琯坐與適之善貶宜春太
守琯融之子也林甫恨韋堅不已遣使於循河及江淮
州縣求堅罪所在收繫綱典船夫溢於牢獄徵剥逋負
延及鄰伍皆裸露死於公府至林甫薨乃止 李林甫

以王忠嗣功名日盛恐其入相忌之 董延光之攻吐

蕃也過期不克言王忠嗣沮撓軍計上怒李林甫因使

濟陽別駕魏林告忠嗣嘗自言我幼養宮中與忠王相

愛狎欲擁兵以尊奉太子敕徵忠嗣入朝委三司鞫之

戶部侍郎兼御史中丞楊慎矜為上所厚李林甫浸

忌之慎矜與王鉞父晉中表兄弟也少與鉞狎鉞之入

臺頗因慎矜推引及鉞遷中丞慎矜與語猶名之鉞自

恃與林甫善意稍不平慎矜奪鉞職田鉞母本賤慎矜

嘗以語人鉅深銜之慎矜猶以故意待之嘗與之私語
識書慎矜與術士史敬忠善敬忠言天下將亂勸慎矜
於臨汝山中買莊爲避亂之所會慎矜父墓田中草木
皆流血慎矜惡之以問敬忠敬忠請禳之設道場於後
園慎矜退朝輒輟貫桎坐其中旬日血止慎矜德之
慎矜有侍婢明珠色美敬忠屢目之慎矜即以遺敬忠
車載過貴妃柳氏姊樓下姊邀敬忠上樓求車中美人
敬忠不敢拒明日姊入宮以明珠自隨上見而異之問

所從來明珠具以實對上以慎矜與術士為妖法惡之
含怒未發楊釗以告鉗鉗心喜因侮慢慎矜慎矜怒林
甫知鉗與慎矜有隙密誘使圖之鉗乃遣人以飛語告
慎矜隋煬帝孫與凶人往來家有讖書謀復祖業上大
怒收慎矜繫獄命刑部大理與侍御史楊釗殿中侍御
史盧鉉同鞠之大府少卿張瑄慎矜所薦也盧鉉誣瑄
嘗與慎矜論議拷掠百端瑄不肯答辨乃以木綴其足
使人張其枷柄向前挽之身加長數尺腰細欲絕眼鼻

出血瑄竟不答又使吉溫捕史敬忠於汝州敬忠與溫父素善溫之幼也敬忠常抱撫之及捕獲溫不與交言鎖其頸以布蒙首驅之馬前至戲水溫使吏誘之曰楊慎矜已款服惟湏子一辨若解人意則生不然必死前至溫湯則求首不獲矣敬忠顧謂溫曰七郎求一紙溫陽不應去溫湯十餘里敬忠懇請哀切乃於桑下令答三紙辨皆如溫意溫徐謂曰丈人且勿怪因起拜之至會昌始鞠慎矜以敬忠為證慎矜皆引服惟搜讖書不

獲林甫危之使盧鉉入長安搜慎矜家鉉袖識書入閤

中詬而出曰逆賊深藏祕記至會昌以示慎矜慎矜歎曰
吾不蓄識書此何從在吾家哉吾應死而已十一月丁酉
賜慎矜及兄少府少監慎餘洛陽令慎名自盡敬忠杖
一百妻子皆流嶺南瑄杖六十流臨封死於會昌嗣虢
王巨雖不預謀坐與敬忠相識解官南賓安置自餘連
坐者數十人慎名聞敕神色不變為書別姊慎餘合掌指
天而縊三司按王忠嗣上曰吾兒居深宮安得與外

人通謀此必妄也但劾忠嗣沮撓軍功哥舒翰之入朝也或勸多齎金帛以救忠嗣翰曰若直道尚存王公必不寃死如其將喪多賂何為遂單囊而行三司奏忠嗣罪當死翰始遇知於上力陳忠嗣之寃且請以已官爵贖忠嗣罪上起入禁中翰叩頭隨之言與淚俱上感寤已亥貶忠嗣漢陽太守李林甫屢起大獄別置推事院於長安以楊釗有掖廷之親出入禁闥所言多聽乃引以為援擢為御史事有微涉東宮者皆指撻使之奏劾

付羅希奭吉溫鞠之釗因得逞其私志所擠陷誅夷者數百家皆釗發之幸太子仁孝謹靜張垧高力士常保護於上前故林甫終不能間也 十二月丙寅命百官

閱天下歲貢物於尚書省既而悉以車載賜李林甫家上或時不視朝百司悉集林甫第門臺省為空陳希烈雖坐府無一人入謁者林甫子岫為將作監頗以滿盈為懼嘗從林甫遊後園指役夫言於林甫曰大人久處鈞軸怨仇滿天下一朝禍至欲為此得乎林甫不樂曰

勢已如此將若之何先是宰相皆以德度自處不事威勢驕從不過數人士民或不之避林甫自以多結怨常虞刺客出則步騎百餘人為左右翼金吾靜街前驅在數百步外公卿走避居則重關複壁以石甃地牆中置板如防大敵一夕屢徙牀雖家人莫知其處宰相驕從之盛自林甫始

八載夏四月咸寧太守趙奉璋告李林甫罪二十餘條狀未達林甫知之諷御史逮捕以為妖言杖殺之

九載夏四月己巳御史中丞宋渾坐贓巨萬流潮陽初
吉溫因李林甫得進及兵部侍郎兼御史中丞楊釗恩
遇浸深溫遂去林甫而附之為釗畫代林甫執政之策
蕭炅及渾皆林甫所厚也求得其罪使釗奏而逐之以
翦其心腹林甫不能救也

十載春正月丁酉命李林甫遙領朔方節度使

十一載 戶部侍郎兼御史大夫京兆尹王鉞弟戶部
郎中鐸凶險不法召術士任海川問我有王者之相否

海川懼亡匿鉞恐事泄捕得託以它事杖殺之王府司馬韋會定安公主之子王繇之同產也詎之私庭鉞又使長安尉賈季鄰收會繫獄縊殺之繇不敢言鐸所善邢綽與龍武萬騎謀殺龍武將軍以其兵作亂殺李林甫陳希烈楊國忠前期二日有告之者夏四月乙酉上臨朝以告狀面授鉞使捕之鉞意鐸在綽所先遣人召之日晏乃命賈季鄰等捕綽綽居金城坊季鄰等至門綽帥其黨數十人持弓刀格鬪突出鉞與楊國忠引兵

繼至絳黨曰勿傷太夫人國忠之僭密謂國忠曰賊有
號不可戰也絳闕且走至皇城西南隅會高力士引飛
龍禁軍四百至擊斬絳捕其黨皆擒之國忠以狀白上
曰鉗必預謀上以鉗任遇深不應同逆李林甫亦為之
辨鮮上乃命特原鐸不問然意欲鉗表請罪之使國忠
諷之鉗不忍上怒會陳希烈極言鉗大逆當誅戊子敕
希烈與國忠鞠之仍以國忠兼京兆尹於是任海川韋
會等事皆發獄具鉗賜自盡鐸杖死於朝堂鉗子準偁

流嶺南尋殺之有司籍其第舍數日不能徧鉗賓佐莫敢窺其門獨採訪判官裴冕收其尸葬之 初李林甫

以陳希烈易制引為相政事常隨林甫左右晚節遂與林甫為敵林甫懼會李獻忠叛林甫乃請解朔方節制且薦河西節度使安思順自代夏四月庚子以思順為朔方節度使 初李林甫以國忠為才且貴妃之族故善遇之國忠與王鉷俱為中丞鉷用林甫徵為大夫故國忠不悅遂深探邢綽獄令引林甫交私鉷兄弟及阿

布思事狀陳希烈哥舒翰從而證之上由是疎林甫國
忠貴震天下始與林甫為仇敵矣南詔數寇邊蜀人
請楊國忠赴鎮左僕射兼右相李林甫奏遣之國忠將
行泣辭上言必為林甫所害貴妃亦為之請上謂國忠
曰卿暫到蜀區處軍事朕屈指待卿還當入相林甫時
已有疾憂懣不知所為巫言一見上可小愈上欲就視
之左右固諫上乃命林甫出庭中上登降聖閣遙望以
紅巾招之林甫不能拜使人代拜國忠比至蜀上遣中

使召還至昭應謁林甫拜於牀下林甫流涕謂曰林甫死矣公必為相以後事累公國忠謝不敢當汗流覆面十二月丁卯林甫薨上晚年自恃承平以為天下無復可憂遂深居禁中專以聲色自娛悉委政事於林甫林甫媚事左右迎合上意以固其寵杜絕言路掩蔽聰明以成其姦妬賢疾能排抑勝已以保其位屢起大獄誅逐貴臣以張其勢自皇太子以下畏之側足凡在相位十九年養成天下之亂而上不之寤也

十二載楊國忠使人說安祿山誣李林甫與阿布思謀
反祿山使阿布思部落降者詣闕誣告林甫與阿布思
約為父子上信之下吏按問林甫壻諫議大夫楊齊宣
懼為所累附國忠意證成之時林甫尚未葬二月癸未
制削林甫官爵子孫有官者除名流嶺南及黔中給隨
身衣及糧食自餘貲產並沒官近親及黨與坐貶者五
十餘人剖林甫棺抉取含珠襖金紫更以小棺如庶人
禮葬之己亥賜陳希烈爵許國公楊國忠爵魏國公賞

其成林甫之獄也

姦臣聚斂

宇文融
王鉷

楊慎矜
楊釗

韋堅

唐玄宗開元九年春正月監察御史宇文融上言天下
戶口逃移巧偽甚衆請加檢括融張之玄孫也源乾曜
素愛其才贊成之二月乙酉敕有司議招集流移按詰
巧偽之法以聞丁亥制州縣逃亡戶口聽百日自首
或於所在附籍或牒歸故鄉各從所欲過期不首即加
檢括謫徙邊州公私敢容庇者抵罪以宇文融充使括

逃移戶口及籍外田所獲巧偽甚衆遷兵部員外郎兼
侍御史融奏置勸農判官十人竝攝御史分行天下其
新附客戶免六年賦調使者競為刻急州縣承風勞擾
百姓苦之陽翟尉皇甫憬上疏言其狀上方任融貶憬
盈川尉州縣希旨務於獲多虛張其數或以實戶為客
凡得戶八十餘萬田亦稱是

十一年秋八月敕前令檢括逃人慮成煩擾令所在州
縣安集遂其生業

十二年夏六月壬辰制聽逃戶自首闢所在閒田隨宜
收稅毋得差科征役租庸一皆蠲免仍以兵部員外郎
兼侍御史宇文融為勸農使巡行州縣與吏民議定賦
役 秋八月己亥以宇文融為御史中丞乘驛周流天
下事無大小諸州先牒上勸農使後申中書省司亦待
融指揮然後處決時上將大攘四夷急於用度州縣畏
融多張虛數凡得客戶八十餘萬田亦稱是歲終增緡
錢數百萬悉進入宮由是有寵議者多言煩擾不利百

姓上令集百寮於尚書省議之公卿已下畏融恩勢皆不敢立異惟戶部侍郎楊瑒獨抗議以為括客免稅不利居人徵籍外田稅使百姓困弊所得不補所失未幾瑒出為華州刺史

十三年以宇文融兼戶部侍郎制以所得客戶稅錢均充常平倉本錢

十四年中書令張說惡御史中丞宇文融之為人且患其權重融所建白多抑之夏四月壬子融及御史大夫

崔隱甫御史中丞李林甫共彈說引術士占星徇私僭侈受納賄賂庚申罷說中書令

十五年春正月御史大夫崔隱甫中丞宇文融恐右丞相張說復用數奏毀之各為朋黨上惡之二月乙巳制說致仕隱甫免官侍母融出為魏州刺史乙卯制諸州逃戶先經勸農使括定按比後復有逃來者隨到準白丁例輸當年租庸有徵役者免差

十六年春正月甲寅以魏州刺史宇文融為戶部侍郎

兼魏州刺史充河北道宣撫使 丙寅以魏州刺史宇

文融檢校汴州刺史充河南北溝渠堤堰決九河使融
請用禹貢九河故道開稻田并回易陸運錢官收其利
興役不息事多不就

十七年 宇文融性精敏應對辯給以治財賦得幸於上
始廣置諸使競為聚斂由是百官浸失其職而上心益
侈百姓皆怨苦之為人疎躁多言好自矜伐在相位謂
人曰使吾居此數月則海內無事矣信安王禕以軍功

有寵於上融疾之禘入朝融使御史李寅彈之泄於所親禘聞之先以白上明日寅奏果入上怒九月壬子融坐貶汝州刺史凡為相百日而罷是後言財利以取貴仕者皆祖於融冬十月宇文融既得罪國用不足上復思之謂裴光庭等曰卿等皆言融之惡朕既黜之矣今國用不足將若之何卿等何以佐朕光庭等懼不能對會有飛狀告融贓賄事又貶平樂尉至嶺外歲餘司農少卿蔣岑奏融在汴州隱沒官錢鉅萬計制窮治其

事融坐流巖州道卒

二十一年 太府卿楊崇禮政道之子也在太府二十

餘年前後為太府者莫能及時承平日久財貨山積嘗
經楊卿者無不精美每歲鈎校省便出錢百萬緡是歲
以戶部尚書致仕年九十餘矣上問宰相崇禮諸子誰
能繼其父者對曰崇禮三子慎餘慎矜慎名皆廉勤有
才而慎矜為優上乃擢慎矜自汝陽令為監察御史知
太府出納慎名攝監察御史知含嘉倉出納亦皆稱職

上甚悅之慎矜奏諸州所輸布帛有漬污穿破者皆下本州徵折倍錢轉市輕貨徵調始繁矣

天寶元年春三月以長安令韋堅為陝郡太守領江淮租庸轉運使初宇文融既敗言利者稍息及楊慎矜得幸於是韋堅王鉷之徒競以利進百司有事權者稍稍別置使以領之舊官充位而已堅太子之妃兄也為吏以幹敏稱上使之督江淮租運歲增巨萬上以為能故擢任之王鉷方翼之孫也亦以善治租賦為戶部員外

郎兼侍御史

二年春三月江淮南租庸等使韋堅引漕水抵苑東望
春樓下為潭以聚江淮運船役夫匠通漕渠發人丘壟
自江淮至京城民間蕭然愁怨二年而成丙寅上幸望
春樓觀新潭堅以新船數百艘遍榜郡名各陳郡中珍
貨於船背陝尉崔成甫著錦半臂缺胯綠衫而裼之紅
袖首居前船唱得寶歌使羣婦百人盛飾而和之連檣
數里堅䟽進諸郡輕貨仍上百牙盤食上置宴竟日而

罷觀者山積夏四月加堅左散騎常侍其僚屬吏卒褒賞有差名其渾曰廣運

四載秋九月癸未以陝郡太守江淮租庸轉運使韋堅為刑部尚書罷其諸使以御史中丞楊慎矜代之冬

十月上以戶部郎中王鉞為戶口色役使敕賜百姓復除鉞奏徵其輦運之費廣張錢數又使市本郡輕貨百姓所輸乃甚於不復除舊制戍邊者免其租庸六歲而更時邊將貶敗士卒死者皆不申牒貫籍不除王鉞志

在聚斂以有籍無人者皆為避課按籍成邊六歲之外
悉徵其租庸有併徵三十年者民無所訴上在位久用
度日侈後宮賞賜無節不欲數於左右藏取之鉅探知
上指歲貢額外錢帛百億萬貯於內庫以供宮中宴賜
曰此皆不出於租庸調無預經費上以鉅為能富國益
厚遇之鉅務為剝削以求媚中外嗟怨丙子以鉅為御
史中丞京畿采訪使楊釗侍宴禁中專掌摺牘文簿鈞
校精密上賞其彊明日好度支郎諸楊數徵此言於上

又以屬王鉷因奏充判官

楊釗入禁中事
見楊氏之寵

七載度支郎中兼侍御史楊釗善窺上意所愛惡而迎

之以聚斂驟遷歲中領十五餘使夏六月甲辰遷給事

中兼御史中丞專判度支事恩幸日隆

蘇冕論曰設

官分職各有司存政有恒而易守事歸本而難失經遠
之理捨此奚據洎姦臣廣言利以邀恩多立使以示寵
刻下民以厚斂張虛數以獻狀上心蕩而益奢人望怨
而成禍使天子有司守其位而無其事受厚祿而虛其

用宇文融首唱其端楊慎矜王鉞繼遵其軌楊國忠終成其亂仲尼云寧有盜臣而無聚斂之臣誠哉是言前車既覆後轍未改求達化本不亦難乎

八載春二月戊申引百官觀左藏賜帛有差是時州縣殷富倉庫積粟帛動以萬計楊釗奏請所在糶變為輕貨及徵丁租地稅皆變布帛輸京師屢奏帑藏充牣古今罕儔故上帥羣臣觀之賜釗紫衣金魚以賞之上以國用豐衍故視金帛如糞壤賞賜貴寵之家無有限極

楊氏之寵

唐玄宗天寶三載 初武惠妃薨上悼念不已後宮數
千無當意者或言壽王妃楊氏之美絕世無雙上見而
悅之乃令妃自以其意乞為女官號太真更為壽王娶
左衛郎將韋昭訓女潛內太真宮中太真肌態豐豔曉
音律性警穎善承迎上意不替歲寵遇如惠妃宮中號
曰娘子凡儀體皆如皇后

四載秋八月壬寅冊楊太真為貴妃贈其父玄琰兵部

尚書以其叔父玄珪為光祿卿從兄銛為殿中少監錡
為駙馬都尉癸卯冊武惠妃女為太華公主命錡尚之
及貴妃三姊皆賜第京師寵貴赫然楊釗貴妃之從祖
兄也不學無行為宗黨所鄙從軍於蜀得新都尉考滿
家貧不能自歸新政富民鮮于仲通常資給之楊玄琰
卒於蜀釗往來其家遂與其中女通鮮于仲通名向以
字行頗讀書有材智劍南節度使章仇兼瓊引為采訪
使使委以心腹嘗從容謂仲通曰今吾獨為上所厚苟

無內援必為李林甫所危聞楊妃新得幸人未敢附之
子能為我至長安與其家相結吾無患矣仲通曰仲通
蜀人未嘗遊上國恐敗公事今為公更求得一人因言
釗本末兼瓊引見釗儀觀甚偉言辭敏給兼瓊大喜即
辟為推官往來浸親密乃使之獻春綵於京師將別謂
曰有少物在郾以具一日之糧子過可取之釗至郾兼
瓊使親信大齎蜀貨精美者遺之可直萬緡釗大喜過
望晝夜兼行至長安歷抵諸妹以蜀貨遺之曰此章仇

公所贈也時中女新寡釗遂館於其室中分蜀貨以與之於是諸楊日夜譽蕙瓊且言釗善擣捕引之見上得隨供奉官出入禁中改金吾兵曹參軍

五載夏五月乙亥以劔南節度使章仇蕙瓊為戶部尚書諸楊引之也楊貴妃方有寵每乘馬則高力士執轡授鞭織繡之工專供貴妃院者七百人中外爭獻器服珍玩嶺南經略使張九章廣陵長史王翼以所獻精美九章加三品翼入為戶部侍郎天下從風而靡民間

歌之曰生男勿喜生女勿悲君今看女作門楣妃欲得
生荔枝歲命嶺南馳驛致之比至長安色味不變至是
妃以妬悍不遜上怒命送歸兄銛之第是日上不懌比
日中猶未食左右動不稱旨橫被捶撻高力士欲嘗上
意請悉載院中儲侍送貴妃凡百餘車上自分御膳以
賜之及夜力士伏奏請迎貴妃歸院遂開禁門而入自
是恩遇愈隆後宮莫得進矣

七載冬十一月癸未以楊貴妃姊適崔氏者為韓國夫

人適裴氏者為虢國夫人適柳氏者為秦國夫人三人皆有才色上呼之為姨出入宮掖並承恩澤勢傾天下每命婦入見玉真公主等皆讓不敢就位三姊與鈺錡五家凡有請託府縣承迎峻於制敕四方賂遺輻湊其門惟恐居後朝夕如市十宅諸王及百孫院昏嫁皆先以錢千緡賂韓虢使請無不如志上所賜與及四方獻遺五家如一競開第舍極其壯麗一堂之費動踰千萬既成見它人有勝已者輒毀而改為虢國尤為豪蕩一

旦帥工徒突入韋嗣立宅即撤去舊屋自為新第但授
韋氏以隙地十畝而已中堂既成召工巧墁約錢二百
萬復求賞技號國以絳羅五百段賞之嗤而不顧曰請
取螻蟻蜥蜴記其數置堂中苟失一物不敢受直

九載春二月楊貴妃復忤旨送歸私第戶部郎中吉溫
因宦官言於上曰婦人識慮不遠違忤聖心陛下何愛
宮中一席之地不使之就死豈忍辱之於外舍邪上亦
悔之遣中使賜以御膳妃對使者涕泣曰妾罪當死陛

下幸不殺而歸之今當永離掖庭金玉珍玩皆陛下所
賜不足為獻惟髮者父母所與敢以薦誠乃翦髮一縷
而獻之上遽使高力士召還寵待益深時貴戚競以進
食相尚上命宦官姚思藝為檢校進食使水陸珍羞數
千盤一盤費中人十家之產中書舍人竇華嘗退朝值
公主進食列於中衢傳呼按轡出其間宮苑小兒數百
奮挺於前華僅以身免 楊釗以圖識有金刀請更名
上賜名國忠

十載春正月庚子楊氏五宅夜遊與廣平公主從者爭
西市門楊氏奴揮鞭及公主衣公主墜馬駙馬陳昌裔
下扶之亦被數鞭公主泣訴於上上為之杖殺楊氏奴
明日免昌裔官不聽朝謁

十一載京兆尹王鉷權寵日盛領二十餘使鉷得罪勅
楊國忠鞠之仍以國忠兼京兆尹夏五月丙辰楊國
忠加御史大夫京畿關內採訪使凡王鉷所綰使務悉
歸國忠十一月庚申以楊國忠為右相兼文部尚書

其判使並如故國忠為人彊辯而輕躁無威儀既為相以天下為已任裁決機務果敢不疑居朝廷攘袂扼腕公卿以下顧指氣使莫不震懼自侍御史至為相凡領四十餘使臺省官有才行時名不為已用者皆出之或勸陝郡進士張彖謁國忠曰見之富貴立可圖彖曰君輩倚楊右相如泰山吾以為冰山耳若皎日既出君輩得無失所恃乎遂隱居嵩山十二月楊國忠欲收人望建議文部選人無問賢不肖選深者留之依資據闕

注官滯淹者翕然稱之國忠凡所施置皆曲徇時人所
欲故頗得衆譽

十二載春正月京兆尹鮮于仲通諷選人請為國忠刻
頌立於省門制仲通撰其辭上為改定數字仲通以金
填之冬十月上幸華清宮楊國忠與虢國夫人居第
相鄰晝夜往來無復期度或竝轡走馬入朝不施鄣幕
道路為之掩目三夫人將從車駕幸華清宮會於國忠
第車駕僕從充溢數坊錦繡珠玉鮮華奪目國忠謂客

曰吾本寒家一旦緣椒房至此未知稅駕之所然念終不能致令名不若且極樂耳楊氏五家隊各為一色衣以相別五家合隊粲若雲錦國忠仍以劔南旌節引於其前國忠子暄舉明經學業荒陋不及格禮部侍郎達奚珣畏國忠權勢遣其子昭應尉撫先白之撫伺國忠入朝上馬趨至馬下國忠意其子必中選有喜色撫曰大人白相公郎君所試不中程式然亦未敢落也國忠怒曰我子何患不富貴乃令鼠輩相賣策馬不顧而去

撫惶遽書白其父曰彼恃挾貴勢令人慘嗟安可復與
論曲直遂置暄上等及暄為戶部侍郎珣始自禮部遷
吏部暄與所親言猶歎已之淹回珣之迅疾國忠既居
要地中外餉遺輻湊積纁至二千萬匹

十三載春二月丁丑楊國忠進位司空甲申臨軒命
自去歲水旱相繼關中大饑楊國忠惡京兆尹李峴
不附已以災沴歸咎於峴九月貶長沙太守峴禕之子
也上憂雨傷稼國忠取禾之善者獻之曰雨雖多不害

稼也上以為然扶風太守房琯言所部水災國忠使御史推之是歲天下無敢言災者高力士侍側上曰淫雨不已卿可盡言對曰自陛下以權假宰相賞罰無章陰陽失度臣何敢言上默然

十四載安祿山反冬十二月上議親征辛丑制太子監國謂宰相曰朕在位垂五十載倦于憂勤去秋已欲傳位太子值水旱相仍不欲以餘災遺子孫淹留俟稍豐不意逆胡橫發朕當親征且使之監國事平之日朕將

高枕無為矣楊國忠大懼退謂韓虢秦三夫人曰太子素惡吾家專橫久矣若一旦得天下吾與姊妹併命在旦暮矣相與聚哭使三夫人說貴妃銜土請命於上事遂寢

肅宗至德元載楊國忠勸上幸蜀上至馬嵬驛將士飢疲皆憤怒龍武大將軍陳玄禮以禍由楊國忠欲誅之會吐蕃使者二十餘人遮國忠馬訴以無食國忠未及對軍士追殺之并殺其子暄及韓國秦國夫人上命

高力士縊貴妃於佛堂國忠妻裴柔與其幼子晞及虢國夫人夫人子裴徽走至陳倉吏士追捕誅之

事見安史之亂

安史之亂一

唐玄宗開元二十四年春三月張守珪使平盧討擊使左驍衛將軍安祿山討奚契丹叛者祿山恃勇輕進為虜所敗夏四月辛亥守珪奏請斬之祿山臨刑呼曰大夫不欲滅奚契丹邪奈何殺祿山守珪亦惜其驍勇欲活之乃更執送京師張九齡批曰昔穰苴誅莊賈孫武

斬宮嬪守珪軍令若行祿山不宜免死上惜其才敕令
免官以白衣將領九齡固爭曰祿山失律喪師於瀟不
可不誅且臣觀其貌有反相不殺必為後患上曰卿勿
以王夷甫識石勒枉害忠良竟赦之安祿山者本營州
雜胡初名阿荦山其母巫也父死母攜之再適突厥安
延偃會其部落破散與延偃兄子思順俱逃來故冒姓
安氏名祿山又有史宰干者與祿山同里閭先後一日
生及長相親愛皆為互市牙郎以驍勇聞張守珪以祿

山為捉生將祿山每與數騎出輒擒契丹數十人而返
狡黠善揣人情守珪愛之養以為子宰干嘗負官債亡
入奚中為奚遊奕所得欲殺之宰干紿曰我唐之和親
使也汝殺我禍且及汝國遊奕信之送諸牙帳宰干見
奚王長揖不拜奚王雖怒而畏唐不敢殺以客禮館之
使百餘人隨宰干入朝宰干謂奚王曰王所遣人雖多
觀其才皆不足以見天子聞王有良將瑣高者何不使
之入朝奚王即命瑣高與牙下三百人隨宰干入朝宰

干將至平盧先使人謂軍使裴休子曰奚使瑣高與精銳俱來聲云入朝實欲襲軍城宜謹為之備先事圖之休子乃具軍容出迎至館悉阮殺其從兵執瑣高送幽州張守珪以率干為有功奏為果毅累遷將軍後入奏事上與語悅之賜名思明

三十九年平盧兵馬使安祿山傾巧善事人人多譽之上左右至平盧祿山皆厚賂之由是上益以為賢御史中丞張利貞為河北採訪使至平盧祿山曲事利貞乃

至左右皆有賂利貞入奏盛稱祿山之美八月乙未以祿山為營州都督充平盧軍使兩蕃勃海黑水四府經略使

天寶元年分平盧別為節度以安祿山為節度使

二年春正月安祿山入朝上寵待甚厚謁見無時祿山奏言去秋營州蟲食苗臣焚香祝天云臣若操心不正事君不忠願使蟲食臣心若不負神祇願使蟲散即有羣鳥從北來食蟲立盡請宣付史官從之

三載春三月己巳以平盧節度使安祿山兼范陽節度使以范陽節度使裴寬為戶部尚書禮部尚書席建侯為河北黜陟使稱祿山公直李林甫裴寬皆順旨稱其美三人皆上所信任由是祿山之寵益固不搖矣

四載秋九月安祿山欲以邊功市寵數侵掠奚契丹奚契丹各殺公主以叛祿山討破之冬十月安祿山奏臣討契丹至北平郡夢先朝名將李靖李勣從臣求食遂命立廟又奏薦奠之日廟梁產芝

六載春正月戊寅以范陽平盧節度使安祿山兼御史大夫祿山體充肥腹垂過膝嘗自稱重三百斤外若癡直內實狡黠常令其將劉駱谷留京師訶朝廷指趣動靜皆報之或應有賤表者駱谷即為代作通之歲獻俘虜雜畜奇禽異獸珍玩之物不絕於路郡縣疲於遞運祿山在上前應對敏給雜以詖諧上嘗戲指其腹曰此胡腹中何所有其大乃爾對曰更無餘物止有赤心耳上悅又嘗命見太子祿山不拜左右趣之拜祿山拱立

曰臣胡人不習朝儀不知太子者何官上曰此諸君也
朕千秋萬歲後代朕君汝者也祿山曰臣愚鄙者惟知
有陛下一人不知乃更有諸君不得已然後拜上以為
信然益愛之上嘗宴勤政樓百官列坐樓下獨為祿山
於御座東間設金雞障置榻使坐其前仍命捲簾以示
榮寵命楊銛楊錡貴妃三姊皆與祿山叙兄弟祿山得
出入禁中因請為貴妃兒上與貴妃共坐祿山先拜貴
妃上問何故對曰胡人先母而後父上悅 李林甫以

王忠嗣功名日盛恐其入相忌之安祿山潛蓄異志託以禦寇築雄武城大貯兵器請忠嗣助役因欲留其兵忠嗣先期而往不見祿山而還數上言祿山必反林甫益惡之唐興以來邊帥皆用忠厚名臣不久任不遙領不兼統功名著者往往入為宰相其四夷之將雖才略如阿史那社爾契苾何力猶不專大將之任皆以大臣為使以制之及開元中天子有吞四夷之志為邊將者十餘年不易始久任矣皇子則慶忠諸王宰相則蕭嵩

牛仙客始遙領矣蓋嘉運王忠嗣專制數道始兼統矣
李林甫欲杜邊帥入相之路以胡人不知書乃奏言文
臣為將怯當矢石不若用寒族胡人胡人則勇決習戰
寒族則孤立無黨陛下誠以恩洽其心彼必能為朝廷
盡死上悅其言始用安祿山至是諸道節度使盡用胡
人精兵咸戍北邊天下之勢偏重卒使祿山傾覆天下
皆出於林甫專寵固位之謀也

七載夏六月庚子賜安祿山鐵券

九載夏五月乙卯賜安祿山爵東平郡王唐將帥封王
自此始 秋八月丁巳以安祿山兼河北道採訪處置
使 安祿山屢誘奚契丹為設會飲以葷茗酒醉而阮
之動數千人函其酋長之首以獻前後數四至是請入
朝上命有司先為起第於昭應祿山至戲水楊釗兄弟
姊妹皆往迎之冠蓋蔽野上自幸望春宮以待之冬十
月辛未祿山獻奚俘八千人上命考課之日書上上考
前此聽祿山於山谷鑄錢五爐祿山乃獻錢樣千緡

十載春正月上命有司為安祿山起第於親仁坊敕令
但窮壯麗不限財力既成具幄帟器皿充牣其中有帖
白檀牀二皆長丈潤六尺銀平脫屏風帳一方一丈八
尺於厨廐之物皆飾以金銀金飯甕二銀淘盆二皆受
五斗織銀絲筐及箴簪各一它物稱是雖禁中服御之
物殆不及也上每令中使為祿山護役築第及造諸侍
賜物常戒之曰胡眼大勿令笑我祿山入新第置酒乞
降墨敕請宰相至第是日上欲於樓下擊毬遽為罷戲

命宰相赴之日遣諸楊與之選勝遊宴侑以梨園教坊
樂上每食一物稍美或後苑校獵獲鮮禽輒遣中使走
馬賜之絡繹於路甲辰祿山生日上及貴妃賜衣服寶
器酒饌甚厚後三日召祿山入禁中貴妃以錦繡為大
襦祿裹祿山使宮人以綵輿舁之上聞後宮喧笑問其
故左右以貴妃三日洗祿山兒對上自往觀之喜賜貴妃
洗兒金銀錢復厚賜祿山盡歡而罷自是祿山出入宮
掖不禁或與貴妃對食或通宵不出頗有醜聲於外上

亦不疑也安祿山求兼河東節度使二月丙辰以河東節度使韓休珉為左羽林將軍以祿山代之戶部郎中吉溫見祿山有寵又附之約為兄弟說祿山曰李右丞相雖以時事親三兄必不肯以兄為相溫雖蒙驅使終不得超擢兄若薦溫於上溫即奏兄堪大任共排林甫出之為相必矣祿山悅其言數稱溫才於上上亦忘曩日之言會祿山領河東因奏溫為節度副使知留後以大理司直張通儒為留後判官河東事悉以委之是時楊

國忠為御史中丞方承恩用事祿山登降殿階國忠常扶掖之祿山與王鉞俱為大夫鉞權任亞於李林甫祿山見林甫禮貌頗倨林甫陽以他事召王大夫鉞至趨拜甚謹祿山不覺自失容貌益恭林甫與祿山語每揣知其情先言之祿山驚服祿山於公卿皆慢侮之獨憚林甫每見雖盛冬常汗沾衣林甫乃引與坐於中書廳撫以溫言自解披袍以覆之祿山忻荷言無不盡謂林甫為十郎既歸范陽劉駱谷每自長安來必問十郎何言

得美言則喜或但云語安大夫須好檢校輒反手據床
曰噫嘻我死矣祿山既蕪領三鎮賞刑已出日益驕恣
自以曩時不拜太子見上春秋高頗內懼又見武備墮
弛有輕中國之心孔目官嚴莊掌書記高尚因為之解
圖讖勸之作亂祿山養同羅奚契丹降者八千餘人謂
之曳落河曳落河者胡言壯士也及家僮百餘人皆驍
勇善戰一可當百又畜戰馬數萬匹多聚兵仗分遣商
胡詣諸道販鬻歲輸珍貨數百萬私作緋紫袍魚袋以

百萬計以高尚嚴莊張通儒及將軍孫孝哲為腹心史
思明安守忠李歸仁蔡希德牛廷玠向潤容李庭望崔
乾祐尹子奇何千年武令珣能元皓田承嗣田乾真阿
史那承慶為爪牙尚雍奴人本名不危頗有辭學薄遊
河朔貧困不得志常歎曰高不危當舉大事而死豈能
齧草根求活邪祿山引置幕府出入卧内尚典牋奏莊
治簿書通儒萬歲之子孝哲契丹也承嗣世為盧龍小
校祿山以為前鋒兵馬使治軍嚴整嘗大雪祿山按行

諸營至承嗣營寂若無人入閱士卒無一人不在者祿山以是重之

十一載冬十二月甲申以平盧兵馬使史思明兼北平太守充盧龍軍使哥舒翰素與安祿山安思順不協上常和解之使為兄弟是冬三人俱入朝上使高力士宴之於城東祿山謂翰曰我父胡母突厥公父突厥母胡族類頗同何得不相親翰曰古人云狐向窟嗥不祥為其忘本故也兄苟見親翰敢不盡心祿山以為譏其

胡也大怒罵翰曰突厥敢爾翰欲應之力士目翰翰乃止陽醉而散自是為怨愈深

十二載夏五月阿布思為回紇所破安祿山誘其部落而降之由是祿山精兵天下莫及安祿山以李林甫狡猾踰已故畏服之及楊國忠為相祿山視之蔑如也由是有隙國忠屢言祿山有反狀上不聽楊國忠欲厚結翰與共排安祿山奏以翰兼河西節度使秋八月戊戌賜翰爵西平郡王

十三載春正月己亥祿山入朝是時楊國忠言祿山必反且曰陛下試召之必不來上使召之祿山聞命即至庚子見上於華清宮泣曰臣本胡人陛下寵擢至此為國忠所疾臣死無日矣上憐之賞賜巨萬由是益親信祿山國忠之言不能入矣太子亦知祿山必反言於上上不聽上欲加安祿山同平章事已令張垼草制楊國忠諫曰祿山雖有軍功目不知書豈可為宰相制書若下恐四夷輕唐上乃止己巳加祿山左僕射賜一子

三品一子四品官 安祿山求兼領閑廐羣牧庚申以

祿山為閑廐隴右羣牧等使祿山又求兼摠監壬戌兼
知摠監事祿山奏以御史中丞吉溫為武部侍郎充閑
廐副使楊國忠由是惡溫祿山密遣親信選健馬堪戰
者數千匹別飼之 二月己丑安祿山奏臣所部將士
討奚契丹九姓同羅等勲效甚多乞不拘常格超資加
賞仍好寫告身付臣軍授之於是除將軍者五百餘人
中郎將者二千餘人祿山欲反故先以此收衆心也三

月丁酉朔祿山辭歸范陽上解御衣以賜之祿山受之
驚喜恐楊國忠奏留之疾驅出關乘船渡河而下令船
夫執繩板立於岸側十五里一更晝夜兼行數百里過
郡縣不下船自是有言祿山反者上皆縛送之由是人
皆知其將反無敢言者祿山之發長安也上令高力士
餞之長樂坂及還上問祿山慰意乎對曰觀其意怏怏
必知欲命為相而中止故也上以告國忠曰此議它人
不知必張垆兄弟告之也上怒貶張均為建安太守垆

為盧溪司馬弟給事中叔為宜春司馬

十四載春二月辛亥安祿山使副將何千年入奏請以
蕃將三十二人代漢將上命立進畫給告身韋見素謂
楊國忠曰祿山久有異志今又有此請其反明矣明日
見素當極言上未允公其繼之國忠許諾壬子國忠見
素入見上迎謂曰卿等有疑祿山之意邪見素因極言
祿山反已有迹所請不可許上不悅國忠逡巡不敢言
上竟從祿山之請它日國忠見素言於上曰臣有策可

坐消祿山之謀今若除祿山平章事召詣闕以賈循為
范陽節度使呂知誨為平盧節度使楊光翮為河東節
度使則勢自分矣上從之已草制上留不發更遣中使
輔璆琳以珍果賜祿山潛察其變璆琳受祿山厚賂還
盛言祿山竭忠奉國無有二心上謂國忠等曰祿山朕
推心待之必無異志東北二虜藉其鎮遏朕自保之卿
等勿憂也事遂寢安祿山歸至范陽朝廷每遣使者
至皆稱疾不出迎盛陳武備然後見之裴士淹至范陽

二十餘日乃得見無復人臣禮楊國忠日夜求祿山反
狀使京兆尹圍其第捕祿山客李超等送御史臺獄潛
殺之祿山子慶宗尚宗女榮義郡主供奉在京師密報
祿山祿山愈懼六月上以其子成昏手詔召祿山觀禮
祿山辭疾不至秋七月祿山表獻馬三千匹每匹執鞍
夫二人遣蕃將二十二人部送河南尹達奚珣疑有變
奏請諭祿山以進車馬宜俟至冬官自給夫無煩本軍
於是上稍寤始有疑祿山之意會輔璆琳受賂事亦泄

上託以它事撲殺之上遣中使馮神威齎手詔諭祿山如珣策且曰朕新為卿作一湯十月於華清宮待卿神威至范陽宣旨祿山踞牀微起亦不拜曰聖人安穩又曰馬不獻亦可十月灼然詣京師即令左右引神威置館舍不復見數日遣還亦無表神威還見上泣曰臣幾不得見大家安祿山專制三道陰蓄異志殆將十年以上待之厚欲俟上晏駕然後作亂會楊國忠與祿山不相悅屢言祿山且反上不聽國忠數以事激之欲其

速反以取信於上祿山由是決意遽反獨與孔目官太僕丞嚴莊掌書記屯田員外郎高尚將軍阿史那承慶密謀自餘將佐皆莫之知但怪其自八月以來屢饗士卒秣馬厲兵而已會有奏事官自京師還祿山詐為敕書悉召諸將示之曰有密旨令祿山將兵入朝討楊國忠諸君宜即從軍衆愕然相顧莫敢異言十一月甲子祿山發所部兵及同羅奚契丹室韋凡十五萬衆號二十萬反於范陽命范陽節度副使賈循守范陽平盧節

度副使呂知誨守平盧別將高秀巖守大同諸將皆引
兵夜發詰朝祿山出薊城南大閱誓衆以討楊國忠為
名榜軍中曰有異議扇動軍人者斬及三族於是引兵
而南祿山乘鐵輦步騎精銳煙塵千里鼓譟震地時海
內久承平百姓累世不識兵革猝聞范陽兵起遠近震
駭河北皆祿山統內所過州縣望風瓦解守令或開門
出迎或棄城竄匿或為所擒戮無敢拒之者祿山先遣
將軍何千年高邈將奚騎二千聲言獻射生手乘驛詣

太原乙丑北京副留守楊光翹出迎因劫之以去太原具言其狀東受降城亦奏祿山反上猶以為惡祿山者詐為之未之信也庚午上聞祿山定反乃召宰相謀之楊國忠揚揚有得色曰今反者獨祿山耳將士皆不欲也不過旬日必傳首詣行在上以為然大臣相顧失色上遣特進畢思琛詣東京金吾將軍程千里詣河東各簡募數萬人隨便團結以拒之辛未安西節度使封常清入朝上問以討賊方略常清大言曰今太平積久故

人望風憚賊然事有逆順勢有奇變臣請走馬詣東京
開府庫募驍勇挑馬箠渡河計日取逆胡之首獻闕下
上悅壬申以常清為范陽平盧節度使常清即日乘驛
詣東京募兵旬日得六萬人乃斷河陽橋為守禦之備
甲戌祿山至博陵南何千年等執楊光翮見祿山責光
翮以附楊國忠斬之以徇祿山使其將安忠志將精兵
軍土門忠志奚人祿山養為假子又以張獻誠攝博陵
太守獻誠守珪之子也祿山至藁城常山太守顏杲卿

力不能拒與長史袁履謙往迎之祿山輒賜杲卿金紫
質其子弟使仍守常山又使其將李欽湊將兵數千人
守井陘口以備西來諸軍杲卿歸途中指其衣謂履謙
曰何為著此履謙悟其意乃陰與杲卿謀起兵討祿山
杲卿思魯之玄孫也丙子斬太僕卿安慶宗賜榮義郎
主自盡以朔方節度使安思順為戶部尚書思順弟元
貞為太僕卿以朔方右廂兵馬使九原太守郭子儀為
朔方節度使右羽林大將軍王承業為太原尹置河南

節度使領陳留等十三郡以衛尉卿猗氏張介然為之
以程千里為潞州長史諸郡當賊衝者始置防禦使丁
丑以榮王琬為主帥右金吾大將軍高仙芝副之統諸
軍東征出內府錢帛於京師募兵十一萬號曰天武軍
旬日而集皆市井子弟也 十二月丙戌高仙芝將飛
騎驍騎及新募兵邊兵在京師者合五萬人發長安上
遣宦者監門將軍邊令誠監其軍屯於陝 丁亥安祿
山自靈昌渡河以絙約敗船及草木橫絕河流一夕冰

合如浮梁遂陷靈昌郡祿山步騎散漫人莫知其數所
過殘滅張介然至陳留纔數日祿山至授兵乘城衆怵
懼不能守庚寅太守郭納以城降祿山入北郭聞安慶
宗死慟哭曰我何罪而殺我子時陳留將士降者夾道
近萬人祿山皆殺之以快其忿斬張介然於軍門以其
將李庭望為節度使守陳留壬辰上下制欲親征其朔
方河西隴右兵留守城堡之外皆赴行營令節度使自
將之期二十日畢集初平原太守顏真卿知祿山且

反因霖雨完城浚壕料丁壯實倉廩祿山以其書生易之及祿山反牒真卿以平原博平兵七千人防河津真卿遣平原司兵李平間道奏之上始聞祿山反河北郡縣皆風靡歎曰二十四郡曾無一人義士邪及平至大喜曰朕不識顏真卿作何狀乃能如是真卿使親客密懷購賊牒詣諸郡由是諸郡多應者真卿杲卿之從弟也安祿山引兵向滎陽太守崔無詖拒之士卒乘城者聞鼓角聲自墜如雨癸巳祿山陷滎陽殺無詖以其將

武令珣守之祿山聲勢益張以其將田承嗣安忠志張
孝忠為前鋒封常清所募兵皆白徒未便訓練屯武牢
以拒賊賊以鐵騎蹂之官軍大敗常清收餘衆戰於蔡
園又敗戰上東門內又敗丁酉祿山陷東京賊鼓譟自
四門入縱兵殺掠常清戰於都亭驛又敗退守宣仁門
又敗乃自苑西壞牆西走河南尹達奚珣降於祿山留
守李愷謂御史中丞盧奕曰吾曹荷國重任雖知力不
敵必死之矣許諾愷收殘兵數百欲戰皆棄愷潰去愷

獨坐府中奕先遣妻子懷印間道走長安朝服坐臺中
左右皆散祿山屯於閑廐使人執愷弈及采訪判官蔣
清皆殺之弈罵祿山數其罪顧賊黨曰凡為人當知逆
順我死不失節夫復何恨愷文水人奕懷慎之子清欽
緒之子也祿山以其黨張萬頃為河南尹封常清帥餘
衆至陝陝郡太守竇廷芝已奔河東吏民皆散常清謂
高仙芝曰常清連日血戰賊鋒不可當且潼關無兵若
賊豕突入關則長安危矣陝不可守不如引兵先據潼

關以拒之仙芝乃帥見兵西趣潼關賊尋至官軍狼狽走無復部伍士馬相騰踐死者甚衆至潼關修完守備賊至不得入而去祿山使其將崔乾祐屯陝臨汝弘農濟陰濮陽雲中郡皆降於祿山是時朝廷徵兵諸道皆未至關中怵懼會祿山方謀稱帝留東京不進故朝廷得為之備兵亦稍集祿山以張通儒之弟通晤為睢陽太守與陳留長史楊朝宗將胡騎千餘東略地郡縣官多望風降走惟東平太守嗣吳王祗濟南太守李隨起

兵拒之祇禕之弟也郡縣之不從賊者皆倚吳王為名
單父尉賈賁帥吏民南擊睢陽斬張通晤李庭望引
兵欲東徇地聞之不敢進而還上議親征太子監

國楊國忠使貴妃請命事遂寢

事見楊氏之寵

顏真卿召

募勇士旬日至萬餘人諭以舉兵討安祿山繼以涕
泣士皆感憤祿山使其黨段子光齎李愷盧奕蔣清
首徇河北諸郡至平原壬寅真卿執子光腰斬以徇
取三人首續以蒲身棺斂葬之祭哭受弔祿山以海

運使劉道玄攝景城太守清池尉賈載鹽山尉河內穆
寧共斬道玄得其甲仗五十餘船攜道玄首謁長史李
暉暉收嚴莊宗族悉誅之是日送道玄首至平原真卿
召載寧及清河尉張澹詣平原計事饒陽太守盧全誠
據城不受代河間司法李真殺祿山所署長史王懷忠
李隨遣遊奕將訾嗣賢濟河殺祿山所署博平太守馬
冀各有衆數千或萬人共推真卿為盟主軍事皆稟焉
祿山使張獻誠將上谷博陵常山趙郡文安五郡團結

兵萬人圍饒陽 高仙芝之東征也監軍邊令誠數以
事干之仙芝多不從令誠入奏事具言仙芝常清撓敗
之狀且云常清以賊搖衆而仙芝棄陝地數百里又盜
減軍士糧賜上大怒癸卯遣令誠齎敕即軍中斬仙芝
及常清初常清既敗三遣使奉表陳賊形勢上皆不之
見常清乃自馳詣闕至渭南敕削其官爵令還仙芝軍
白衣自效常清草遺表曰臣死之後望陛下不輕此賊
無忘臣言時朝議皆以為祿山狂悖不日授首故常清

云然令誠至潼關先引常清宣敕示之常清以表附令
誠上之常清既死陳尸蘧蔭仙芝還至聽事令誠索陌
刀手百餘人自隨乃謂仙芝曰大夫亦有恩命仙芝遽
下令誠宣敕仙芝曰我遇敵而退死則宜矣今上戴天
下履地謂我盜滅糧賜則誣也時士卒在前皆大呼稱
枉其聲振地遂斬之以將軍李承光攝領其衆河西隴
右節度使哥舒翰病廢在家上藉其威名且素與祿山
不協召見拜兵馬副元帥將兵八萬以討祿山仍敕天

下四面進兵會攻洛陽翰以疾固辭上不許以田良丘
為御史中丞充行軍司馬起居郎蕭昕為判官蕃將火
拔歸仁等各將部落以從并仙芝舊卒號二十萬軍于
潼關翰病不能治事悉以軍政委田良丘良丘復不敢
專決使王思禮主騎李承光主步二人爭長無所統壹
翰用法嚴而不恤士卒皆解弛無鬪志 安祿山大同
軍使高秀巖寇振武軍朔方節度使郭子儀擊敗之
顏杲卿將起兵參軍馮虔前真定令賈深橐城尉崔安


石郡人翟萬德內丘丞張通幽皆預其謀又遣人語太原尹王承業密與相應會顏真卿自平原遣杲卿甥盧逖潛告杲卿欲連兵斷祿山歸路以緩其西入之謀時祿山遣其金吾將軍高邈詣幽州徵兵未還杲卿以祿山命召李欽湊使帥衆詣郡受犒賚丙午薄暮欽湊至杲卿使袁履謙馮虔等攜酒食妓樂往勞之并其黨皆大醉乃斷欽湊首收其甲兵盡縛其黨明日斬之悉散井陘之衆有頃高邈自幽州還且至藁城杲卿使馮虔

往擒之南境又白何千年自東京來崔安石與翟萬德
馳詣醴泉驛迎千年又擒之同日致於郡下千年謂果
卿曰今太守欲輸力王室既善其始當慎其終此郡應
募烏合難以臨敵宜深溝高壘勿與爭鋒俟朔方軍至
併力齊進傳檄趙魏斷燕薊要脅彼則成擒矣今且宜
聲云李光弼引步騎一萬出井陘因使人說張獻誠云
足下所將多團練之人無堅甲利兵難以當山西勁兵
獻誠必解圍遁去此亦一奇也果卿悅用其策獻誠果

遁去其團練兵皆潰杲卿乃使人入饒陽城慰勞將士
命崔安石等徇諸郡云大軍已下井陘朝夕當至先平
河北諸郡先下者賞後至者誅於是河北諸郡響應凡
十七郡皆歸朝廷兵合二十餘萬兵附祿山者唯范陽
盧龍密雲漁陽汲鄴六郡而已杲卿又密使人入漁陽
招賈循邺城人馬燧說循曰祿山負恩悖逆雖得洛陽
終歸夷滅公若誅諸將之不從命者以范陽歸國傾其
根柢此不世之功也循然之猶豫不時發別將牛潤容

知之以告祿山祿山使其黨韓朝陽召循朝陽至漁陽
引循屏語使壯士縊殺之滅其族以別將牛廷玠知范
陽軍事史思明李立節將蕃漢步騎萬人擊博陵常山
馬燧亡入西山隱者徐遇匿之得免 初祿山自將欲
攻潼關至新安聞河北有變而還蔡希德將兵萬人自
河內北擊常山

通鑑紀事本末卷三十一上



總校官庶吉士 臣 張能照

校對官修撰 臣 吳錫齡

謄錄監生 臣 楊省曾